

MPAG diarah segera lesenkan semua ladang ternakan

Alor Gajah: Kerajaan negeri Melaka mengesahkan menerima laporan mengenai pencemaran di Sungai Tuang akibat pembuangan najis babi tanpa dirawat.

EXCO Pertanian dan Pembangunan Usahawan negeri, Datuk Hasan Abdul Rahman, berkata sisa kumbahan ternakan itu dipercayai dari ladang ternakan di Paya Mengkuang di sini, sebelum dilepaskan ke pantai berhampiran.

“Buat masa ini, kita akan kenakan syarat kepada penternak sedia ada supaya tidak melepaskan sisa kumbahan. Mereka kena simpan dalam kolam takungan, sebelum disedut keluar dan dibawa ke tempat lain.

“Bagaimanapun, kita syak dan difahamkan ada (Sungai Tuang). Jadi, pihak Majlis Perbandaran Alor Gajah (MPAG) dan Jabatan Pengairan dan Saliran (JPS) diminta memantau,” katanya kepada BH.

40 ladang tak berlesen

Ada 40 ladang diusahakan 36 penternak babi konvensional tidak berlesen di Melaka setakat ini.

Bagaimanapun, kerajaan negeri sudah mengarahkan MPAG melesenkan semua ladang itu selewat-lewatnya awal tahun depan.

Hasan berkata, kerajaan negeri sedang menyediakan pelan tindakan jangka panjang dengan mengubah kepada ternakan moden menjelang 2018.

“Semua penternak konvensional diarah mematuhi syarat pembinaan penternakan moden dengan menyediakan pelan bangunan dan saliran. Jika gagal berbuat demikian, kita arahkan ia ditutup mengikut piawaian MPAG,” tegasnya.

Sementara itu, Pengarah Pengairan dan Saliran, Mohamad Radzi Abdul Talib, berkata siasatan segera akan dilakukan.

“Sepatutnya, mereka (penternak) tahu kita syarat untuk rawat kumbahan najis babi itu, sebelum dilepaskan ke sungai.

“Jika ia dirawat, sepatutnya kurang bau dan juga tidak ada pelepasan secara langsung. Mereka perlu sediakan kolam takungan untuk rawat kumbahan itu, sebelum dilepaskan,” katanya ketika dihubungi.



Semua
penternak
konvensional
diarah patuhi

syarat pembinaan penternakan moden dengan sediakan pelan bangunan dan saliran. Jika gagal berbuat demikian, kita arahkan ia ditutup mengikut piawaian MPAG”

Hasan Abdul Rahman,
EXCO Pertanian dan Pembangunan
Usahawan Melaka